

山川紀異錄  
下冊



卷四之十一



山川紀異錄

祠墓類

譚節婦祠在永新縣學婦姓趙宋宗室女元兵破城趙氏從家  
匿縣學中兵至殺其舅姑與夫執氏欲污之不從遂并其子  
俱殺之血漬禮殿八磚上宛然一婦人抱嬰兒狀或磨以沙  
石不滅燬以火其迹益顯

泉州府境小常村宋時有叛卒楊勅者畧一婦誓死不從遂遇  
害屍棄道旁人為收瘞之其枕藉處形迹不滅每遇雨則乾  
晴則濕削去復見或覆以他土其迹愈明

岳飛墓在杭州州棲霞嶺墓上古木枝皆南向或謂其忠義所感





宅在臬司治右廟有井飛時被害女尚幼挾銀瓶投井今併祀之最靈異

宣聖墓在曲阜縣西北八里廣百餘畝當泗水而墓水為之却流塋中樹以千數皆異國弟子持其方樹來種之者魯人世居其地亦莫能徧識其名塋中不生荆棘及刺人草墓有古石壇及古石儀廟前即舊時講道之所北有子路捨丁石南有宋真宗御寶殿歷代碑誌遠近相望其氣運與天地相為悠久云

橫山西南曰祠山其神張渤夫人李氏最靈顯凡遇水旱有禱輒應其俗歲祀之為坎于庭以所祭牛及器百納于

明日發之一空竟莫知所自

忻州西十里有唐晉王李克用墓金天眷初盜發之守墳僧言之郡守守夢王告云吾墓中有酒盜飲之者唇皆黑可用此捕之明日獲盜寺僧居其半王亦多智哉

武山在辰州盧溪縣西即槃瓠生犬戎之地今山中石室有石狀類狗即槃瓠像其俗至今不食犬上有槃瓠廟存焉

平定州承天鎮有妬女祠婦女有盛裝麗色過祠下者必致風雹唐武后幸河東道經女祠欲別開道避之狄仁傑諫曰一人行幸風伯清塵雨師洒道何妬女之避哉遂止其役駐驛日風停雨息亦無他異



召石山在山東文登縣秦始皇欲造橋渡海觀日出處海神為之驅石行不速者鞭之見血至今山下石皆赤色舊傳始皇求神相見神約以無圖我形皇從之及見左右巧者潛圖神形神怒曰帝負約可速去橋遂不成今廟在縣南六十里晉卞壺墓在應天府西朝天宮側唐末盜發之見其面如生疆髮手拳爪達于手背盜驚為收瘞之洪武初古今墳塚悉遷於城外獨留壺一墓於城中以勵後世為人臣者鄧州故城內有西魏征南將軍張澹碑背刻云白楸之棺易朽之裳銅鐵不入凡器不蔽嗟爾後人幸勿我傷宋元嘉中為盜所發獲金銅器物甚多至今人誚其詭

湯陰縣路旁有扁鵲墓相傳墓土可以療疾疾者禱而求之或不覓得一小丸如丹劑服之即愈

澧州有驩堯廟左右立石三皆數十丈俗呼相公繫馬柱石祁縣成湯廟土人遇旱輒詣祠下置空瓶於案拜舞禱雨瓶若得水則雨立至

陽曲縣西有風穴下建神廟相傳神至則穴中有聲去則寂然大原府境有趙襄子祠五代時潞王從珂與石敬瑭入廟見神像屹然起立

楚霸王廟在和州東北宋紹興間金主亮欲渡江乞杯琰不從亮怒欲焚廟俄見大蛇繞梁殿後林木中鼓躁發聲若數千



兵者亮驚走衆皆駭散

應州城有天王村晉王李克用母禱于祠見金甲神人踴躍而出遂生克用因名村

武安縣南有鼓山上有二石如鼓南北相當鼓鳴則兵起高齊末常鳴而齊滅隋末亦鳴聲聞數百里而隋亡高澄欲葬高歡作虛塚於漳水西鑿堯於鼓山石窟佛頂之旁納歡柩而殺群臣及齊亡一匠之子知之發石窟盜金器而逃

錦石岩在仁化縣南其下為錦石溪石壁上五色間生如鋪錦綺多類梅花形時或變幻其下有龍王祠座後石窟高數尺人莫敢近不計春夏石常滋潤遇旱禱之其旁覺龍影動則

雨立至

九鯉湖何仙廟在仙游縣東北歲嘗大比士子多祈夢於此至驗

彬江中洲上有堯舜禹湯廟每遇水漲其洲若浮議云沙洲生到太平前彬州出狀元太平乃廢寺名

竹山縣有鬼神壇周圍二頃無草木惟生茅茨每歲清明日祭而燎之如燎草盡其年必豐屢驗多應

三仙廟在丹陽縣西吳孫權祖鐘種瓜為業有三士詣門求瓜鐘設以待之因指以堯化鶴飛去鍾卒壅其地後人因立廟祀之今瓜丘灌井鐘墓並存



邵武府西有廣祐廟極靈異四方水旱祈禱響應有謁夢錄宋李綱嘗夢神延接讓以主位綱辭神曰他日更仗主盟及為相值神加封綱果與署名又葉祖洽赴省試夢神以犬肉一片置几上命食之又指殿下竹一束示之莫喻其義明年作大魁方悟片犬肉置几上乃狀元二字也前此廷對皆出賦至是科始問策乃知竹一束策字也顯異逮今無不驗者

武昌府旌忠坊有岳廟宋時知鄂州羅願以父汝楫常附秦檜論飛不敢入廟一日自念已政善姑往祠之再拜遽卒於廟人疑飛之憾不釋云

新建吳城山有順濟祠乃番陽湖龍神廟宋熙寧中遣太常林

希逸致祭見異蛇引首望禮畢入帳中及還復尾舳艫送至彭蠡而沒蘇軾歸自儋耳艤舟祠下忽得古石弩矢於岸側傳觀之忽失手墜湖中因禱于神許留于廟使人沒水一探而得因記其事并作望湖亭詩

宜興縣荆南山有池產三足鼈六目龜東漢袁玘長縣常自言死當為神一夕飲醉無疾而終風雨失其柩夜聞是山有數千人聲民往視之則墳已成塚因立祠山下

魯肅墓在鎮江府東舊有王伯陽者就葬其妻一日見人乘肩輿導從而至曰我魯子敬也葬此二百年何輒見壞目左右牽伯陽以刀環築之伯陽告諸家人遂卒人始知為魯肅墓



襄陽府有壇刺史初至必牽羊詣壇遶之以其所遶之數驗治  
州之年多寡晉文帝為刺史行六次不止果至八年屢驗皆  
應

渾源州北有律呂神祠相傳秦初元年六月州人張珪晚憇狐  
石上見人自空而下言曰律呂律呂上天勅汝此月二十日  
行硬雨語畢騰空去珪遍語村人使速收麥未及收者至日  
悉為雨傷盡事聞詔祠祭之

歸州有鐵棺峽唐將軍王果為雅州刺史舟經三峽望懸崖間  
有物如棺令人視之骸骨存焉有誌云三百年後水漂我將  
及長江垂欲墮遇王果果見愴然歛而去

香山縣西海濱有角山其形如象宋時夜聞人聲喧動追曉見  
山旁屹立一石如小室鄉人望泗州大聖於中旱禱輒應  
嶧縣東南有將軍山上有神廟廟前石多馬蹄迹  
淮安西北湖中有朱仙墓雖湖水大漲墓亦不沒



山川紀異錄

寺觀類

鐵棺塚在興化縣南法華寺西長九尺二十前闊後狹宛若棺狀宋建炎間薛慶常遣人搖動中有物相觸聲以鐵槌擊數百畧無少損又鼓鞀鎔之其固自若

淮安紫極宮舊有神仙題詩于壁其迹漬入刮之不滅又有李公麟畫猴戲馬馬驚而圍人鞭之之狀世稱絕筆

鐵柱宮在南昌府治南有池方丈中有鐵柱出土二尺狀若恠石其大如斗水涸乃見相傳晉許旌陽所鑄以息蛟害者其池水常與民間井江中水相為消長



甘露寺在鎮江府北有梁武帝書天下第一江山六字并賜鐵  
鑊二其量容百斛下有狼石如羊相傳諸葛武侯常坐其上  
與孫權議拒曹操者城內有興國寺舊苦鳩鴿汚佛像唐張  
僧繇於東壁畫一鷹西壁畫一鷄自後鳩鴿不復入

含山縣褒禪寺有石塔宋張孝祥書寶塔二字于上墨迹入石  
三分今存

信豐縣有塔九層常時無影影現則邑人有菑

松滋縣東羅公洲有觀甚大而惟一柱杜甫詩孤城一柱觀落

### 日九江秋

福建華嚴岩頂神光寺巖若臺記乃李陽冰所篆與處州新驛

記縉雲縣城隍記麗水縣忘歸臺銘世稱四絕

四川瀆江洙水蒙水三江之合悍流怒浪之濱鑿山為彌勒佛  
大像高踰三百六十尺建七層閣覆之

寫韻軒在南昌府南紫極宮舊傳吳猛女彩鸞遇文蕭于西山  
許為配歸鍾陵蕭貧不自給鸞日寫孫愐唐韻一部運筆如  
飛鸞之獲金五緡盡則復寫後為人所知遂各跡虎陟藥王  
山峯而去今石上虎迹猶存

富順縣勸農山有聖燈院常有燈出烟霧中見則封域寧謐年  
歲豐登山之西有石峰高數丈如佛像旁有二石儼若侍者  
皆出自天成



萬壽宮在新建縣西乃許旌陽故宅舊有檜一株高五尺乃其  
君所植者枝葉覆地翦而復長元末燬于兵火昔授道于謀  
母將歸母取香茅一根擲之曰子歸認茅落處立吾祠後訪  
飛茅于黃堂去所居五十里已叢生矣遂建祠其茅色白味  
辛異于他種

宝陀寺在廣州金利都靈峯山蘇東坡泊舟於此夜夢僧授以  
脂麻糕晨起餘香猶在齒頰入寺詢之僧云今日德雲和尚  
誕日衆設脂麻糕供佛東坡因題云靈峯山上宝陀寺白髮  
東坡又再來前世德雲今我是依稀猶記妙高臺後人遂創  
東坡閣于寺側

廣聖寺在廣州城番塔街塔建于夷人輪囷直上凡十六丈五  
尺外無層級闌干止留洞穴其顛立金雞一隨風南北每五  
六月雷雨入海夷人率以五更登絕頂呼佛號驗金雞以祈  
風信洪武二十五年颶風毀塔頂金雞墮蘇仲實家後以事  
沒于官

南昌府舊有大樟樹故郡名豫章樹為異物所憑為民患滋久  
每年買一女装送入廟經宿死遂瘞其地唐天師胡惠超宿  
廟中見巨蛇繚繞旦入樹穴因燎其樹恠遂滅創道觀于上  
今即玄妙觀

曲江縣曹溪南華寺乃六祖慧能示寂之地俗傳自開元坐化



以來肉身不壞香烟熏面如漆或以手摩之覺鬚髮如剃後  
兩三日者元末亂兵剝其脅而驗之白乳香流又有折一指  
節至江西以獻呂元帥者帥送還寺成化二年寺僧奏請建  
塔奉真身于中今衣鉢尚存其衣有二一乃達磨所傳係西  
域屈响布緝木綿花心織成者其一乃唐玄宗所賜上織淡  
山水又有西天鉢非銅鐵非木石有西天履非革非木未曉  
為何物有貝葉經十七葉有字虎皆如刀削有師指節以小  
銀盒貯之並存于寺

崑山縣北有鞍山慧聚寺僧慧嚮欲建殿有鬼工自壘石為殿  
基遺迹至今名神運殿

### 山川紀異錄

#### 鳥獸類

登州去海五里春夏時常見水面有城郭市肆人物車馬往來  
若交易狀土人謂之海市或以為蜃氣海中有海牛常遊島  
上無角長丈餘紫色足似龜尾若鮎魚其行至捷見人輒飛  
赴水中皮堪作弓韃脂可燃燈又有海驢秋月上島產乳其  
皮水不能潤可以禦雨有海狸亦上島產乳逢人則入水復  
化為魚

安南有猩猩人面豕身形類猿猴居民常候之設酒及糟於路  
側連結草履猩猩見之即知其祖先姓名辱罵不已既而曰



奴欲張我亟捨去復自謂曰姑試之共嘗酒逮醉取履着之不覺自仆遂為人所擒拷問血幾何少則鞭捶之及至殺取血卒如其所言之數

大理府浪穹縣西南有鳳羽山舊傳鳳止此山而死每歲終衆鳥哀吊其上土人舉火取之鳥輒赴火自死

湖廣興國軍盤塘有神鴉遇客舟往返輒入篷底乞食弗與則飛繞桅檣喧噪不已

沙縣西北百二十里有幼山中有山魅其形類人生毛黑皆長丈餘逢人則笑能迅走捕人而食

興國縣南有上谷山石室可書相傳中多木客蓋鬼類

貌似人常砮杉枋與人交易又常就民間飲酒其詩云酒盡君莫沽壺乾我當發城市多警塵還山弄明月

廣德州東南桃花山石有金牛及牧童足迹又有金雞雲形皆天成西南大首山有井龜魚時出沒其中遇陰雨輒聞作樂聲又東北七十里有金牛嶺舊傳有僧逐一金牛入洞不出僧亦化石立洞口遇晦夜天燈輒現

章丘縣西南有雞山昔有聞雞鳴其上者候之獲一石潔如玉遂不復有聲

渭源縣西有烏鼠山渭水經其下其地烏與鼠多同穴崇慶州多融山有物獼猴長七尺能人行健走名猴獼一名馬



化伺行道婦人輒盜之州之西有慕願山中有平地百步諸山之鹿一日一聚於此號為鹿市

馬窟山在湖廣光化縣東山有石窟漢時有馬數百從窟出形小似巴滇馬吳陸遜攻襄陽時山之北穴又出馬數十匹載還建業值蜀使至有兵家滇池者識其馬色云此亡父所乘也對之流涕

金雞山在崇仁縣西南舊浮丘公於此養雞雞皆金色現則豐稔樵者於岩口常獲雞糞其堅如石

石象猶存

銅陵縣金山常有金牛出遊鄉民設窰陷之故地有大欄小欄之名

丹陽縣有金鶯池宋夏竦為主簿侍母燕坐見黃鶯雙舞俱入於池發之得金鶯二母命瘞之因建亭其上後人發之不可得遂鑿為池

貴州北有養龍長官司兩山間淵深不測有靈物藏之每春初夷人擇牝馬繫旁樹已而雲霧晦冥類有物蜿蜒與馬交接其產必龍駒洪武四年夏明昇獻良馬十其一白色乃得之於此者首高九尺長丈餘不可控御詔祀馬祖然後勅典牧者囊沙四百斤壓而乘之行苑中久漸馴習後將行夕月之



禮於清涼山乘之如躡雲一塵弗驚賜名飛越峯仍命繪形  
截焉學士宋濂有贊

羊山在岳池縣北峯巒秀異洞名角竹樵牧者每見羊自洞出  
叱之復回梁天監中有隱者棲隱講誦於此羊跪聽因以名  
山

贛州會昌縣西有羊山山有神祠每歲祀以生羊縱之不去虎  
亦不食

陸川縣有石袍山山多草木葱翠如袍舊有肉翅虎嘗下山食  
人復飛還山

山川紀異錄

宮室類

泐溪石室在樂昌縣泐溪上石高三十餘丈室深三丈闊五丈  
室外藤蘿聯絡登者攀緣而入中有陸羽題名墨迹六祖石  
床石曰存焉

臥龍岡在南陽縣山起自嵩山之南綿亘數百里至此截然而  
止回旋如巢孔明草廬居其中廬前有諸葛井以青石為床  
上有汲綆痕數百數不能真蓋為祠有道士居之夜聞兵聲  
懼而移去宣德中復新其廬

鉅野縣南金鄉山北有清涼洞深十餘丈內鑿石作四小



外一堂陞高三尺堂外兩門門外兩大閣石道長三十丈闊  
十六尺世傳為秦始皇避暑之所漢魯共鑿山為墓得白兔  
乃不葬更葬山南得金故名金鄉山其塚今存

山川紀異錄

草木類

山東曲阜縣孔林大成門北有檜一株高逾五丈圍一丈三尺  
相傳宣聖所植形勢屈曲狀若虬龍晉永嘉三年樹忽枯瘁  
至隋義寧元年復榮唐乾封二年復枯逮宋康定元年始榮  
大金時燬其枝幹根亦為所戕元至元三年復榮茂如故一  
物之微有關於世運之盛衰如此

穀城縣西南六十里有薤山產孤竹三莖三年生一筍新筍既  
成舊竹即死代謝不已諸山雲起此山若無雲終不雨土人  
以為驗



金華永康縣延真觀有松化石唐永徽中道士馬自然謂此  
三千年當化為石至夕風雨松果化云刺史楊發拜兩石人  
郡齋又以二石置龍興寺石鱗紋起宛然蒼皮黛色

慈利縣天門山其中空明透徹上貫山頂門角上各有一松  
垂下拂俗名天帚縣境有雷公洞天色陰晦則中隱  
鳴兩壁峭立狀若神像

行唐縣西北三十五里有古柏大數十圍上有鐵環相傳隋  
建德琢以繫馬者

上海縣靜安寺庭有雙檜乃陳時所植宋政和間朱勔圖進徽  
廟遣使採之夕暴風震雷忽碎其一遂已今殿右者尚存

松江府北禪寺宋有稱回先生者過之植一樟樹於堂後而去  
數年樟瘁回復造焉問章公何在取佩瓢內藥一丸瘞諸根  
下樟復茂葉葉俱顯瓢痕人始悟回為呂仙

章丘縣東有豐山乃漢鄭玄刊註詩書之地上有古井旁生草  
似蓬俗謂書帶草

汾州西有古槐年久朽如剝舟金皇統中有異士貨藥投樹復  
活俗號仙槐

劍州西延福寺有古木一甚巨或見白羊二常往來其下近則  
不復見之

滎陽縣東有古槐形甚奇恠世傳漢高祖為王時常繫馬於此



襄陽均州南有太和山上有小山名石階地生草名救窮冬夏  
不枯月食三寸可以絕穀不饑

鄖縣有錫義山方圓百里其形如城四面有門上有石壇谷生  
薇蘅草有風不偃無風自搖

萍鄉縣羅霄山巔有葛仙壇旁生二竹風動如掃壇無一塵

靖真觀在南昌府城西南觀有二松相去五尺合為一幹號曰  
義松

金華府北有春草岩乃赤松子羽化處岩間不生蔓草止出龍  
鬚草大者為虎鬚可為燈炷

漢中府金州治西有心山上有草無風常搖有風不偃

長沙府攸縣東有司空山乃南齊張岳隱居之所山有洗藥池

中生龍鬚菜味甘可食日未出時浮生水面日既出則没于  
水若潔心以往則隨采可得或混以葷腥則苦不下咽

安福縣東南百里有龍陂吳孫皓伐木順流而下至此木沉以  
繩挽之有烈風雷雨之變後旱率眾牽木風雨隨至宋元嘉  
中木忽浮水其半猶溺壅成沙洲今為陂

漢陽縣西柏泉寺有古井世傳大禹植柏於大別山其根盤曲  
直至井底今柏根尚存又大別山陽太平興國寺前亦有古  
柏俗傳禹治水時所植者

桂東縣有萬王城階旁有脩竹數竿日夕自仆掃除塵土而復



自立內有桃李彌望鄉人采食其實甚甘但不可取或私藏之必迷歸路

建昌縣北有冷水觀有壽松一株枝幹屈曲奇恠舊傳許旌陽嘗掛劍于上又縣南有壽樟枝葉婆娑四時常青宋高宗嘗問及之

峴山下有柏柯幹如鏡石下有小碑題曰晉柏乃羊祜所植者山有墮淚碑

成都府南有鐵爐山五代時日者占此當出異人乃撻羅氏塚見松根纏棺狀若雙龍取刀斷之流血不止月桂峯在武林山相傳月桂墜此峰而生者其花白其實丹狀

若珠璣與他種迥異山在浙江

東莞縣東南有廬山山多仙桃楊梅至者任採而食攜出則迷路莫知所之

道州南五十里產竹班暈相傳舜妃洒淚所致州之左湖中有小山其巔有穴石可以為樽

瑞州府東集仙觀有許旌陽所植柏三株及丹井存焉

巴東縣庭寇萊公為令時手植二柏今存公安縣有萊公竹公貶雷州卒歸葬西京道出公安邑人設祭道哭折竹植地掛紙錢悉生筍衆為立祠祀之

金齒軍民指揮司東岳壇內有土墩一周圍三十餘丈高六尺



相傳為武侯旗臺隨水高下雖盛潦不沒又瀾滄江南三十  
里有樹高五尺其上鏃如蝟刺蓋此蒲蠻出沒之路過者必  
射樹以壓勝之至今猶然

瑞蓮池在雩都縣治西池產異蓮其葉名雙捲劔脊其花曰雙  
頭了髻三萼二十四葉其實名覆鐘金鏃或移植他處輒變  
常種

雙筭石在上虞縣釣臺山前高各百餘尺對峙溪上若  
人冕而立者其巔有異花開若霞錦宋神宗崩三年不  
榮高宗崩花忽變白孝宗崩三年若枯已而復茂今不  
存惟有松一株挺然特秀然非人力所能植也

### 山川紀異錄

#### 鱗介類

茅山龍池中多蜥蜴似龍無角或移置他所遇風雨輒復故處  
洞庭湖有巨蚌深夜展一殼如片帆往來煙波間吞吐明珠與  
月爭輝漁者百計取之莫能得

劍州普安廢縣有唐裴光庭浴丹池池中有魚赤鬣金色飛躍  
其中或取之者輒觸風雷之變

通江縣有龍灘昔有神龍出水為馬躍石上遺迹今存

松江府西南有五色泉相傳葛玄煉丹投水故湧泉成五色郡  
士有見之者必擢高第又江出鱸魚獨四腮吳王闔閭好鱸



魚鱠江行有餘鱠棄諸水中化為魚今名鱠殘一名王餘魚  
南海有豎魚長二丈餘脊若鋒刃時至南海廟前而退俗謂來  
朝或數年一來或一年數至來數則民有疾疫屢驗

蒲城縣抱陽山顯濟廟前潭有青蛇二能興雲雨變見不測鄉  
人所賽者與之酒輒直立俯首飲之故昔人詩有青蛇立飲  
祭神酒句

安南長官司出鱗蛇長丈餘四足有黃鱗黑鱗之異能食鹿春  
冬在山夏秋在水二人殺而食之取其膽治牙疼并合解毒  
藥尤妙廣東潮州境亦有之

平陽府平山麓有金龍池晉永嘉中有<sup>姓</sup>媪者出野見巨卵持

歸育之得一兒名櫛兒生四歲劉淵築城不就募能城者櫛  
兒應募因變為蛇令媪遺灰誌其後憑灰築城並就淵性之  
遂潛入山穴露尾數寸使者斬之忽湧泉出穴匯為此池

青龍沼在武寧縣東有青龍出此今石上二足迹猶存

饒州府東魏石山有龍居寺池有龍神居之宋岳飛過寺題魏  
石山前寺林泉勝境幽紫金諸佛相白雪老僧頭潭水寒生  
月松聲夜帶秋我來屬龍語為雨濟民憂觀此則岳武穆豈  
獨長於武畧而已

越雋衛北有魚洞河有魚長一二丈頭特大遙望如戴鍍釜  
潛虬泉在宜興頤山幽深泓澄中產異魚四足能行率數歲一



出出必有水災

桂林府興安縣東龍蟠山上有石洞門數重遊者秉燭而入中有水產魚似鮎四足有角聲如小兒人不敢捕恐致風雨今商州溪中亦有此魚俗名鮎魚即爾雅所謂鯢也

寧德縣北霍童山并有海鱮甚巨若弄水浸堰堤天即大雨或先霖潦弄水即晴

順德縣有象膊山其勢兩膊下垂如象之膊山近海若白首魚出現則風雨立至

彰德府湯陰縣舊傳孫登寓此值旱衆禱于龍得雨將祭謝之登曰此病龍雨安能蘇禾稼弗信請嗅之水果腥穢龍時背

生疽聞登言化老翁求治曰病痊當有報不數日果大雨大石上忽裂一井其水湛然蓋龍穿此以報也今在縣西真人社

南海縣西南鎮有神廟七所六皆有蛇其色或金或青或黑或白或赤各異其色悉盤繞於簷楹牆壁或神座上祭者至輒以酒奠之或迎神出廟即盤諸神項其首向前惟天妃廟無之順天府盧師山有龍潭廣丈許巨石覆其上深不可測有大青小青二龍潛焉隋沙門盧師能馴伏之二龍出則雲氣隨興遇旱禱輒應歷代相傳俱有封祀

池州伏龍山有池神龍宅焉凡旱禱之龍或徵露水面則雨立



至

漢陽府襄水中產物如馬其甲類解鯉七八月間在沙磧上自曝其膝頭似虎掌爪小兒不知取戲弄之恒至殺人

徽州有黃敦湖陳時程靈洗常夢人告為呂湖蛟所困明日幸見助靈洗問何以為識曰白練者我也及旦見二牛相觸有

由者困靈洗射黑牛死視之乃蛟也呂湖遂堙

新會縣崑崙鄉崑崙山上有白龍池但池生雲霧龍即飛騰每遇

旱命僧奏樂至山腰即得雨山中林木茂盛多桃李人至任

取食有懷出者即雲霧消散迷其歸路

香山縣金冲山有瀑布泉下瀉成潭其水清室中有靈物宛然

出入人恒見之變化不測歲旱投文以禱如龜魚噉入頃刻

雨至又邑南北臺山下有小龍潭遇旱燒白石投之輒得雨

太平府城南有鼉浦唐李聿任歙州刺史過浦有鼉魅幽聿潭

中領聿妻子就任凡三年後聿出潭中往尋妻子不識聿學

法斬鼉魅妻子始識之

博白縣南大荒山池產婢妾魚其大如楮兩翼及臍下有三條

練帶長四尺許搖動有光



甲辰臘月得於虞山書室朴野記



山川紀異錄

器皿類

岳州府西南沙磧中有鑄器五俗謂鐵枷重踰千斤長一丈厚二尺四端平分燕尾若兩缺相背中各有巨竅徑尺許未詳所用

銅雀臺在臨漳縣乃曹操以置妓之所今廢土人掘地得瓦青色平瑩上印土人姓名皆八分隸書為硯貯水數日不滲鹽城縣北海岸旁有鐵柱一相傳為秦皇繫馬柱或云瀕海多蛟龍畏鐵故作此鎮之

任丘縣南三十里有神曰容一碩二斗嘗時有沙門移置寺中



經宿血滿淋漓仍移故處復淨如洗

劍山在定遠縣山有寶劍驟雨過常倚立路旁黑夜人多見光

磬石山在靈壁縣山出磬石

朝廷用常取之民間有私取者則無復磬聲

廣州府博大山下溪水中有神鼎刺史劉道錫遣人繫其耳引  
出之耳斷復沒後執紼者皆患耳疾又山前有盧循母檀氏  
墓人犯之輒疾俗謂靈墓

陝州黃河中有鐵牛頭在河南尾在河北相傳大禹治水時鑄  
以鎮河患者

陝州有鐵人二即秦始皇所鑄者其先十二董貞其九為錢  
所存者三石勒取置鄴符堅又徙之未至而亂其一為百姓  
推入河今鼓樓下惟二人即其所遺者

廉耳山在仁化縣北石罅中有鎗竿俗傳黃巢遣其所投者

褒城縣牛山有黃巢谷舊傳巢作亂時太白山人金州刺史

請掘此谷則賊自敗掘之得一石桶上有一劍中有黃腰獸  
見劍自撲而後巢果敗

廣西桂林府融縣西有鐵船山彷彿一船尾插絕頂岩壁間行  
者悉見之

廣州郡西玄妙觀後有銅像三各高七尺舊傳劉鋹令銅匠鑄



已與二子像不似輒戮之久而後成今存于觀  
上猶縣東山寺有鐘形旋如蛟一夕忽飛去墮寺前相陂潭沒  
人出之見鍾化為蛟棄之莫敢近至今水泛數十里鏗然聲  
震金谷時或有見之者形猶鍾也

蕪湖縣有夢日亭在故王敦城上晉明帝聞王敦叛微行至湖  
陰念之數言夢日環其城驚起使五騎追之帝疾馳去見逆  
旅賣食媪以七宝鞭予之曰後有騎來以此示之媪如其言  
五騎傳玩雜留帝因獲免去縣北二十里又有玩鞭亭  
江津縣西周溪上石磧淺水中隱然見雙金釵影又縣北五里  
舊有僧憇此鳥啣其衣牽而上見金注隱石縫中手弗能

折苦檀枝挑出之迹今存

祁陽縣白鶴觀有古鐘一夕雷雨鐘忽吼躍入江中後有客夜  
宿昭潭夢一道流曰吾祁陽白鶴觀道士思歸久矣幸附後  
載客諾之遲明見有鐘卧水次其文曰祁陽縣白鶴觀鐘客  
悟乃載歸之



山川紀異錄

仙釋類

房山縣大房山東北有懸崖千餘天下有石窟闊二丈許泉水湧出深不可測時有白龍出現輒化為魚又嘗聞音樂聲唐時有人篝火浮舟探之行五六日莫究其源但見仙鼠晝飛頰鱗時見開元間遇旱嘗遣使投金龍玉璧金泰和中忽有桃花派出其辨如當五錢

元末有周顛仙者南康建昌人姓來江右凡新官至必謁見云告太平洪武初謁

駕自云入火不熱試覆以巨甕煨以積薪火滅揭視之寒氣凜



然常以手畫地成圈曰破一桶成一桶時陳友諒據江南  
上問友諒有天下否顛仙仰天良久曰上頭說道無之分又問  
可伐否即導杖前驅曰可伐遂伐之次鄱陽湖煙焰漲天勝  
負未次顛仙在蛇樓拍手大笑曰友諒死矣遂宰法鼓樂使  
人呼導曰祭陳友諒衆遂披靡江右乃平後薛入廬山莫知  
所終事見

御製傳

雲母井在增城縣鳳凰臺下唐開耀間何仙姑餌雲母膏汲此  
水製之父母欲為擇配親迎之夕忽不知所之過嶺一書  
云麻姑恠我經望竄一隔仙凡道路送去去滄洲弄

騎黃鶴聽鸞籟有道士自羅浮來見仙姑在麻姑石上寄聲  
父母收井上遺履羅浮黍珠菴東壁亦留題字比晉人差清  
婉少骨今壁半毀惟遺百尺水簾飛白虹笙簫松柏語天十  
三字其下必風字也後二句未有續者

經山在丹陽縣東北昔有異僧講經於此因名上有古杏一株  
相傳晉時所植

應天府撒金街有昇仙橋相傳藍采和常登酒樓唱飲乘雲  
去今橋石上足迹猶存



大正

東京圖書印







